

Hommaïdge en ci Paul Terrier

Lai feuye m'aïppregnaït, tiaind qu'i r'veniôs d' condgie d' tchâtemps, qu' ci Paul Terrier était moûe l' 31 de djuillèt 2007. Mai tête ât pieinne de bés seûv'nis des boussées qu' nôs ains vétçhu ensoinne. È y é pus d' soissante ans qu' an s' coégnéçait, poch'qu' orinâ d' Mont'gnez, ci Paul v'niait bîn s'vent tchie son grant' pére, ïn raïcodjaire en lai r'tréte. D' aivô d' âtres afaints di v'laidge, nôs allïns ensoinne â bôs sat. Tiaind qu' nôs tchairrats étïnt tchairdgie, nôs djuïns dains l' bôs, nôs s' ritïns aïprès, nôs s' coitchïns, nôs graïppoinnïns és aïbres, nôs breûyïns, nôs mâj'nïns des caboinnattes... Oh Paul, i échpére que mitnaint qu' t' és vés Lu, Dûe t' é paidg'nè tes èrpines ! Tot l' monde sait qu' les fruts qu' boussant chus les aïbres des âtres dgens sont aidé moiyouis qu' ces qu' an trove dains son seingne vardgie. Ïn Pére de Mont-Crou, dains ène eurtréte po les afaints, nôs aivait dit qu' an n' ouejait p' moïraudaie. Po des p'téts fruts, po des ç'lieges, des p'tétes bloûeches, des biassons..., an poéyait en pâre dous obïn trâs en péssaint vés l' aïbre. Mains po des pus grôs fruts, an aivait l' drèt d' en pâre ran qu' yun. S'vïns - te des bèlles grôsches è bîn roudges pammes di pammie di Cadyi ! Po être en oûedre d'aivô Li-d'tchus, nôs péssïns pus d' ïn còp vés l' aïbre, en n' pregnaint tchètçe còp ran qu' ène pamme ...!

Les raïcodges è l' traivaiye aint encheûte sépoirè nôs tch'mïns.

Nôs s' sons r'trovè en l' Émulâchion, bîn des années aïprès. T' étôs Présideint d' lai Secchion d' Biene.

Pe, è y é t' aïvu ç'te séaince, è Poërreintru, l' vinte-ché d' aivri 1997, tiaind qu' i d'maindé po l' premie còp en ces blancs gilèts d' lai SJE qu' rioutïnt, d' botaie en piaice ïn Çaçhe de raïcodje di patois. T' feus l' premie, d' aivô ïn âtre Présideint qu' vïnt d' Mont'gnez pe lai Présideinne de Fribo po sôt'ni ç' aivisâle. Ci djoué-li, i seus t' aïvu tot comptant convaintçhu qu' d'aivô dïnche quaitte dieutous pies, an poérait faiç'naie ïn bé moubye qu' tïnrait bîn en piaice sains brâlaie. Ensoinne, è nôs é fayu r'veni è tchairdge quaitre ans d' temps, po enfin déchidaie ces d' Poërreintru è aidmâtre le Çaçhe de raïcodje di patois dains lai véye è vén'râbye jurassienne Sochietè. Aidé, t' és môtrè ton aittatch'ment â *Voïyîn* (nom qu' nôs ains bèyie en ci Çaçhe de raïcodje di patois). D'aivô toi, Paul, nôs ains rempiâchu lai premiere des doûes condichions d' ces d' Poërreintru qu' était qu' â moins vinte dgens feuchïnt ïntèrèchies poi ci nové Çaçhe (nôs sons pus di doubye adj'd'heû). Malhèhrouj'ment, te n' n' veus pus poéyait nôs édie è rempiâtre lai ch'conde condichion : l' nové Çaçhe dait vétçhie â moins vinte ans. T' nôs tçhittes mit'naint qu' le *Voïyîn* é dieche ans. Ch' te piaît, Paul, praye po qu' nôs saïtcheuchïns émondure aidé po qu' note Çaçhe pe nôs bés patois vétieuchïnt djainqu' en lai fin des temps ! Nôs comptans chus toi. Ïn tot grôs mèchi d'aivô note moiyou l' aïmitie !

J-M. Moine